

► Pader Lampe den representacion di Iglesia Catolico a pidi Formador Instituí un Comision di Berdad pa investiga e casonan di corrupcion

“Nos ta kere cu e reconciliacion ta bin despues cu e berdad sali na cla”, asina el a bisa



Pader Rudy Lampe

ORANJESTAD - Ayera mainta Pader Rudy Lampe a duna un declaracion dilanti miembronan di prensa despues cu el a reuni como representante di Iglesia Catolico hunto cu Formador, Sr. Fredi Refunjol.

Pader Lampe a entrega un

documento cu tin aprobacion di Monseñor Secco, como autoridad nobo di Iglesia Catolico, cu ta contene algun recomendacion fundamental cu clero ta pidi atencion pa nan, e.o pa e problemanan social cu tin den nos comunidad y problema di democracia den nos comunidad y instituí un Comision di Berdad.

Pader Lampe a splica cu ta importante pa bin cu un investigacion di loke a sosode den e ultimo añanan na Aruba. E religioso a bisa cu mester investiga tur instancia gubernamental pa e generalizacion di corrupcion cu a tuma lugar den nos sociedad di Aruba. El a menciona cu algun instancia cu mester investiga ta Cuerpo Policial, nos Cuerpo di Duaneronan y nos

Ministerio Publico.

E ta kere cu ta fundamental pa un investigacion tuma lugar awor manera a sosode na Antiyas Hulandes, caminda e investigacion cu a tuma lugar ayanan a hiba cu decenas di polis, duanero a wordo retira.

Segun Pader Lampe e proceso di investigacion mester cuminsa awor y no mañan pasobra “abo no por bisa cu prome bo ta atende e problemanan financiero y despues bo ta investiga pasobra corrupcion ta un problema, y ta causa problema financiero”.

Den su declaracion el a sigui bisa cu pa motibo di corrupcion pueblo di Aruba a perde miyones di Florin. “Si bo kier cuminsa sanea bo situacion financiero, bo mester cuminsa para e proceso di corrupcion

den bo comunidad”.

Pader Lampe a manifesta cu e solicitud aki no ta pa motibo di venganza, no ta pa fomenta discordia den comunidad cu Iglesia Catolico ta pidi pa un Comision di Berdad. “Nos ta kere cu e reconciliacion ta bin despues cu e berdad sali na cla”.

E ta kere cu esaki ta combini un y tur pa un investigacion ta tuma lugar pasobra e “unico

manera como hende cu bo por crese, ta ora cu bo ta reconoce bo foutnan.

Y ora bo ta arrempeti di bo errornan”. Finalmente el a manifesta cu nos ex-gobernantenan, e funcionarionan publico cu a comete actonan di corrupcion, nan mester haya oportunidad pa wordo confronta cu nan errornan y pa nan arrependi di nan errornan.